



Broj, 01-07-10-51-231/2024
Sarajevo, 25.10.2024. godine

Na osnovu člana 25. stav (1) i člana 26. stav (4), a u vezi sa članom 19. stav (5) Zakona o slobodi pristupa informacijama na nivou institucija Bosne i Hercegovine ("Službeni glasnik BiH", br. 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Mirjane Popović, [REDACTED] [REDACTED] od 18.10.2024. godine, predsjednik Visokog sudskog i tužilačkog vijeća Bosne i Hercegovine donosi

RJEŠENJE

I Odobrava se pristup informacijama o načinu pristupa konačnoj odluci u disciplinskom postupku Visokog sudskog i tužilačkog vijeća Bosne i Hercegovine broj 04-07-6-43-35/2019 od 6.11.2019. godine.

II Odbija se pristup odluci Prvostepene disciplinske komisije Visokog sudskog i tužilačkog vijeća Bosne i Hercegovine broj: 11-07-6-618-1/23 od 19.1.2023. godine.

Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je 18.10.2024. godine zaprimilo zahtjev za pristup informacijama Mirjane Popović, [REDACTED] [REDACTED] (u daljem tekstu: podnositeljica zahtjeva), kojim su tražene odluke VSTV-a BiH broj: 11-07-6-618-1/23 od 19.1.2023. godine i 04-07-6-43-35/2019 od 6.11.2019. godine.

U odnosu na tačku I izreke rješenja, uvidom u službenu dokumentaciju utvrđeno je da je konačna odluka VSTV-a BiH broj 04-07-6-43-35/2019 od 6.11.2019. godine objavljena na web stranici VSTV-a BiH <https://vstv.pravosudje.ba> u kategoriji VSTV BiH/Disciplinski postupci/Odluke u disciplinskim postupcima, u anonimiziranoj formi, u skladu sa Odlukom VSTV-a BiH o objavljivanju informacija o disciplinskim postupcima broj 08-02-6844/09 od 9.9.2019. godine i 04-02-1497-2011 od 20.4.2011. godine od 20.4.2011. godine (u daljem tekstu: „Odluka“), koja je tada bila na snazi i koja je predstavljala pravni osnov za objavljivanje ove kategorije odluka u disciplinskim postupcima protiv nosilaca pravosudnih funkcija.

U odnosu na tačku II izreke rješenja, utvrđeno je da je VSTV BiH preko svojih disciplinskih organa, u skladu s članom 17. tačke (4) i (5) kao i članom 55. Zakona o Visokom sudskom i tužilačkom vijeću Bosne i Hercegovine („Službeni glasnik BiH, br. 25/04, 93/05, 48/07, 15/08, 63/23, 9/24 i 50/24; u daljem tekstu: „Zakon o VSTV-u BiH“) ima isključivu nadležnost da vodi disciplinske postupke, utvrđuje disciplinsku odgovornost i izriče disciplinske mjere nosiocima pravosudnih funkcija, a da je u članu 62. istog zakona propisano da Vijeće svojim

Poslovnikom uređuje osnivanje i rad disciplinskih organa, kao i provođenje disciplinskog postupka. Dakle, Zakon o VSTV-u BiH je u odnosu na disciplinske postupke omogućio propisivanje posebnog pravnog osnova koji uređuje pravila ovog postupka, što uključuje i objavljivanje disciplinskih odluka, te je Vijeće članom 113e. Poslovnika VSTV-a BiH ("Službeni glasnik BiH", br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24 i 27/24) od 20.3.2024. godine, koji je stupio na snagu 27.4.2024. godine, u svrhu osiguranja dostupnosti informacija o praksi disciplinskih organa te jačanja integriteta pravosuđa, propisalo da je VSTV BiH u obavezi da na internet stranici Vijeća objavi anonimizirane sve odluke donesene u konkretnom predmetu i to po donošenju konačne odluke u disciplinskom predmetu, a čijim stupanjem na snagu je prestala da važi gore navedena Odluka o objavljivanju informacija o disciplinskim postupcima.

Imajući u vidu da se zahtjevom traži i prvostepena odluka u disciplinskom predmetu koji je konačno završen u periodu 2023. godine, te da je u tom periodu VSTV BiH objavljivao samo konačne odluke u disciplinskim postupcima na gore opisani način u skladu sa predmetnom Odlukom, iz čega proizilazi zaključak da odredba člana 113e. Poslovnika tada nije bila niti usvojena niti je stupila na snagu, nema retroaktivnu primjenu, cijeneći posebno činjenicu da podnosilac zahtjeva nije stranka u postupku, traženu prvostepenu odluku u ovom disciplinskom postupku nije moguće dostaviti.

Postupajući po zahtjevu podnositeljice, a u skladu sa svim gore navedenim, odlučeno je kao u dispozitivu ovog rješenja.

Pouka o pravnom lijeku:

Protiv ovog rješenja podnositeljica zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositeljica žalbe ima pravo pokrenuti upravni spor pred Sudom Bosne i Hercegovine zbog šutnje administracije.

MP
PREDSEDNIK
Halil Lagumdžija



Dostavljeno:

1. Podnositeljici zahtjeva
2. Odjelu za disciplinske postupke i etiku VSTV-a BiH
3. Odjel za imenovanje i napredovanje
4. U spis